


Ўзбекистонда
доимий аҳоли сони

37,7

миллиондан ошди



Миллий статистика қўмитаси маълумотларига кўра,
2025 йилнинг 8 апрель ҳолатига
Ўзбекистоннинг доимий аҳолиси

37 708 861

кишини ташкил этган.

Шундан:

АЁЛЛАР Сони –
18 718 679
киши



ЭРКАКЛАР Сони –
18 990 182
киши

2025-yil
12-aprel
shanba
№46
(5110)

Gazeta 1991-yil 21-martdan chiqa boshlagan

YURT TARAQQIYOTI YO'LIDA BIRLASHAYLIK!

Ishonch

O'zbekiston kasaba uyushmalari Federatsiyasi nashri

Мартин Чунгонг:

ТОШКЕНТ ДЕКЛАРАЦИЯСИ ПРЕЗИДЕНТ ШАВКАТ МИРЗИЁЕВ НУТҚИДАН ИЛҲОМЛАНИБ ЯРАТИЛДИ

Парламентлараро
иттифоқ бош
котибининг
«YUZMA-YUZ+»
лойиҳаси учун берган
интервьюси

2-, 3-саҳифаларда ўқинг...



150 IPU ASSEMBLY
Tashkent, Uzbekistan 5-9 April 2025

ЖАМОА ИШОНЧНИ ОҚЛАЙДИГАН ЕТАКЧИЛАР САЙЛАНЯПТИ

ТАҲЛИЛ

Инсон умри ҳамиша ҳам тинч-осуда кечавермайди. Саломатлиги сабаб ёки бошига оғир ташвиш тушиб ёлғизланиб қолишдан ёмони йўқ. Ана шундай пайтда бир оғиз ширин сўз ёки кимнингдир моддий ёрдами мусибат аҳли кўнглини тоғдек кўтариб, далда бўлади.

Бир қарашда бинойидеккина юрган Наманган шаҳар 20-алоқа бўлими бошлиғи Рафужон Ходиевнинг оғир хасталикка учраганини кўпчилик ҳамкасблари сезмай қолишди. Лекин, шукри, шундай синовли пайтда «Ўзбекистон почтаси» АЖнинг Наманган филиали касба уюшмаси қўмитаси унинг жонига ора кириб, Ҳиндистонда жигар трансплантацияси жарроҳлик амалиётининг ўтказилишига баҳоли қудрат ёрдам қилди.

Почтачи Ҳасанбой Жўраевнинг ҳам бошига тушган кулфат қаддини эгиб кўйди. Узоқ йиллар маблаг йиғиб-тегиб тиклаган уй-жойи бир кунда ёниб, кулга айланди. Ана шундай пайтда яна бошланғич касба уюшмаси далда бўлди. Одатда ўша вазиятдаги қувонч кўз ёшларини тасвирлашга баъзидан қалам ҳам ожизлик қилади. Бундай эзгу савобли ишни, улуғлар таъкидлаганидек, Қаёбани зиёрат қилишга менгаш мумкин.

«Ўзбекистон почтаси» АЖ Наманган филиали касба уюшмаси қўмитасининг ҳисобот-сайлов конференциясида делегатлар ана шу сингари амалга оширилган эзгу ишларни алоҳида таъкидлашди.

Рақамларга мурожаат қилсак, 2020 йилда жамоа шартномаси орқали моддий қўллаб-қувватлаш учун ҳар бир ходимга сарфланган маблаг микдори, яъни иш ҳақи ва унга тенглаштирилган тўловлар 17 миллион 134 минг сўмни ташкил этган бўлса, 2024 йилга келиб, бу кўрсаткич 32 миллион 544 минг сўмга етди.

2024 йилда 413 нафар ходимнинг барчасига навбатдаги меҳнат таътилига чиқаётганда 381 миллион 600 минг сўм моддий ёрдам берилди. Уларни ижтимоий қўллаб-қувватлаш ҳамда соғлиқларини муҳофаза қилиш бўйича 2020 йилда 950 минг сўмдан ажратилган бўлса, 2024 йилга келиб, 1 миллион 961 минг сўмлик юқори малакали тиббий хизмат кўрсатилди.

Шунингдек, фидойилик билан ишлаб, ўзини кўрсатган ходимлардан 11 нафарига «Чимён», «Умид гулшани» ва «Косонсой» санаторийларига имтиёзли йўланмалар берилди. Бу вақт мобайнида жамоа аъзоларининг фарзандларидан 189 нафари соғломлаштириш оромгоҳларида мароқли дам олишди.

Конференцияда касба уюшмасининг ҳисобот давридаги фаолияти қониқарли, деб баҳоланди.

– Бугун почта хизматида ўз касбига меҳр қўйган, фидойи кишилар меҳнат қилишяпти. Уларга муносиб шароит яратиш ва меҳнатларини рағбатлантириш касба уюшмасининг вазифаси ҳисобланади, – дейди тадбирда иштирок этган Ўзбекистон касба уюшмалари Федерацияси Наманган вилояти Кенгаши раиси Ҳасанбой Хожаев. – Бу йилги сайловларда аъзолар етакчидан амалга оширган ишларининг сарҳисобини сўраяпти. Қувончлик билан ишлаган касбақўм раисининг бундай вақтда ҳамкасблари олдида юзи ёруғ. Уларнинг муносиблардан муносибига овоз бериляпти. Қисқаси, жамоа ишончини оқлайдиган етакчилар сайланыпти.

Албатта, айтаверсак, бу каби эзгу ишларнинг адоғи йўқдай туюлади. Муҳими, ходимлар касбақўм раиси Ҳасанбой Ҳамроевнинг ўтган беш йиллик даврдаги фаолиятдан рози эканликларини яқдиллик билан таъкидлашди. Жонқуярлик, фидойилик билан қилинган саъй-ҳаракатлар ўзининг ижобий натижасини берди. Етакчига яна ишонч билдирилди.

Соғлиқни сақлаш ходимлари касба уюшмаси тизимида ҳам сайловлар шафтофлик билан ўтказилмоқда.

– Соғлиқни сақлаш ходимлари касба уюшмаси Наманган вилояти кенгаши тасарруфидаги мавжуд 52 та касба уюшма қўмитасининг 10 тасида янги раислар иш бошлади, – дейди Соғлиқни сақлаш ходимлари касба уюшмаси Наманган вилояти кенгаши раиси Аббосхон Мамадалиев. – Ўйлайманки, бу билан касба уюшмаларига ёш, янгича фикрлайдиган, ташаббускор етакчилар кириб келишди.

– Шу кунгача Наманган вилоятидаги 2 минг 365 та бошланғич ташкилотдан 2 минг 166 тасида 141 минг нафарга яқин аъзолар ўзлари ишонч билдирган номзодларга овоз беришди, – дейди Ўзбекистон касба уюшмалари Федерацияси Наманган вилояти Кенгашининг Ташкилий ишлар бўлими мудир Нозимжон Насинов. – Улардан 183 нафари раисликка илк бора сайланишди. Бу сарфари сайловларнинг яширин овоз бериш йўли билан ўтказилиши ҳам аъзоларнинг ўзлари хоҳлаган номзодга овоз беришларига қулайлик туғдирди. Муҳими, одамлар билан тиллаша оладиган, уларга яхши-ёмон кунларида елкадош бўладиган, кўпчиликнинг ташвиши билан яшайдиган етакчилар сараланиб сайланыпти, десак, айни ҳақиқатни айтган бўламиз.

Анваржон ҲАЛИМОВ
«ISHONCH»



РЕСПУБЛИКАДАГИ ЖАМИ

37 037 ТА

БОШЛАНҒИЧ
КАСАБА УЮШМА
ТАШКИЛОТИДАН,
11 АПРЕЛЬ КУНГИ
МАЪЛУМОТЛАРГА КўРА,

34 331 тасида
(92,7 %)

МУҚОБИЛЛИК АСОСИДА
ҲИСОБОТ-САЙЛОВ
ЙИҒИЛИШЛАРИ
(КОНФЕРЕНЦИЯЛАРИ)
ЎТКАЗИЛДИ.

Ўзбекистон касба
уюшмалари
Федерациясида
куну тун фаолият
кўрсатадиган

1211

қисқа рақамли «Ишонч телефони»,
яъни «Call-center»га мамлакатимизнинг
турли ҳудудларида, олис ва чекка
қишлоқларида яшаётган хотин-қизлар
ўз муаммолари бўйича исталган вақтда
мурожаат қилишлари мумкин.

www.ishonch.uz

www://

ishonch1991@yandex.uz



facebook.com/ishonchofficial.uz



https://t.me/ishonchuz_official



МАРТИН ЧУНГОНГ:

ТОШКЕНТ ДЕКЛАРАЦИЯСИ
НУТҚИДАН ИЛҲОМЛАНИБ

Парламентлараро иттифоқ бош котибининг «Yuzma-yuz+» лойиҳаси

– Ҳурматли Чунгонг жаҳонблари! Сухбатимиз аввалида Ўзбекистон Республикасининг олий давлат мукофоти – «Дўстлик» ордени билан тақдирланганингиз муносабати билан Сизга самимий табрикларимизни изҳор этамиз. Бу юксак эътироф Сизнинг Ўзбекистон ва Парламентлараро иттифоқ ўртасидаги ҳар томонлама ҳамкорликни мустаҳкамлаш, парламент дипломатиясини ривожлантириш, муҳим қўшма дастурларни амалга оширишдаги кўп йиллик самарали фаолиятингиз, шунингдек, мамлакатимиз халқро нуфузини оширишга қаратилган амалий саъй-ҳаракатларингиз натижасидир. Айтингчи, мукофотни қабул қилаётганда кўнглингиздан қандай ҳис-туйғулар кечди?

– Аввало, Сиз яратиб бераётган суҳбатлашиш имкони учун миннатдорлик билдирмаман. Бугун анчадан бери бутун вужудим билан ҳис этаётган, аммо дилимдан тилимга кўчмаган айрим фикрларни ифода этиш бахтига муяссар бўлиб турибман.

Мен учун Ўзбекистон – наинки жўрофий макон, балки маънавий яқинлик, самимият тимоли. Заминингиз билан боғлиқ ҳар бир мулоқот, ҳар бир ташриф, ҳар бир қадам қалбимда илқ из қолдириб келади. Бу юрт ва унинг раҳбарияти билан мулоқотларим – мен учун катта шараф. Айниқса, Президент Шавкат Мирзиёев томонидан билдирилган юксак баҳо, менга кўрсатилган дўстлик ва ҳамжихатлик рамзи сифатидаги эътибор қалбимда чексиз фахр-ифтихор туйғусини уйғотади.

Назаримда, бу эътироф фақат шахсий хизматларим эмас, балки Парламентлараро иттифоқ ва Ўзбекистон ўртасидаги яқин ҳамкорлик самарасининг ёрқин ифодасидир. Биз парламентлар орқали тинчлик, тараққиёт ва мулоқот маданиятини мустаҳкамлашдек улкан мақсадлар сари биргаликда қадам ташламоқдамиз.

2014 йилда ушбу ташкилот Бош котиби лавозимга сайланганимда, ўз олдимга барча аъзо парламентлар билан ҳолис ва тенг мулоқот ўрнатишни мақсад қилиб қўйгандим. Парламентлараро иттифоқни дунёда тинчлик, тараққиёт ва инсон ҳақ-қимматида улуғлайдиган майдонга айлантириш мен учун энг асосий вазифа, бурча айланган.

Бу мақсадларим Президент Мирзиёевнинг сиёсий қарашлари билан ҳамоҳанг эканини кузатдим. У киши 2016 йилда Ўзбекистон Президентлиги этиб сайланган бўлса, мен икки йил аввал ҳозирги лавозимдаги фаолиятимни бошлагандим. Бир қарашда, вақт нуқтаи назаридан фарқ бор, аммо бир мақсад йўлидаги қарашларимиз ўта яқин.

Президент Мирзиёевнинг ташаббуслари, парламентаризмни ривожлантиришга қаратилган ҳаракатлари, инсон манфаатларини олий қадрият сифатида эътироф этадиган халқчил сиёсати – барчаси мен учун илҳом манбаидир. Ва мен ўз ишим, ўз минбарим ана шу юксак йўналишларга хизмат қилаётганидан мамнунман.

Дарҳақиқат, Янги Ўзбекистон дунёда ўрнатилган давлатга айланган борапти. Биз эса юртингизнинг ана шу имижини бутун жаҳонга етказиш учун биргаликда ҳаракат қилишимиз. Менга кўрсатилган эътиборни айнан шу умумий саъй-ҳаракатларимиз эътирофи, деб ҳисоблайман. Ва бу менга янги куч, янги масъулият баҳш этади.

– Тошкент қарийб бир ҳафта мобайнида глобал мулоқот майдонига айланди. Айтинг-чи, Парламентлараро иттифоқнинг 150-йилей Ассамблеясидак ийрик анжумани ўтказиш учун пойтахтимиз танланганида қайси омиллар ҳал қилувчи аҳамиятга эга бўлди?

– Ҳақиқатан, жуда тўғри таъриф бердингиз. Тошкентдаги 150-Ассамблея – катта сиёсий воқеалик. Биз уни «Юбилей Ассамблеяси», деб атадик. Чунки у нафақат ривожланиш марраси, балки янги босқичга ўтиш рамзи ҳамдир. Эътибор беринг: Парламентлараро иттифоқ тарихида 149 та мажлис бўлиб ўтган бўлса-да, бу – Марказий Осиёда илк бор ўтган Ассамблея.

«Нега айнан Тошкентда ўтказилди?», деган саволингизга эса менинг жавобим аниқ. Президентингизнинг парламентаризмга бўлган садоқати, давлат раҳбариятининг замонавий, очиқ ва инклюзив сиёсат юритиши бу танловни амалга оширишимизга туртки бўлди.

Ўзбекистон парламентининг фаолияти, унинг янгиланиш жараёнлари, халқ билан мулоқотга интилиши – барчаси халқро ҳамжамиятда юқори баҳоланмоқда. Биз бунини Ўзбекистон

парламенти фаолиятини таҳлил қилганимизда ҳам кўрдик. Бу борада Ўзбекистон парламентлари вакиллари, мутасаддиларининг ҳам катта меҳнати намоён бўлганини алоҳида таъкидлашни истар эдим. Демак, юртингизда кечаётган давомли демократик жараёнлар бизнинг глобал парламент ҳамжамиятини Ўзбекистонга олиб келишимизга асосий омил бўлди.

Иккинчи сабаб мамлакатингизда турли соҳаларда эришилаётган ютуқлардир. Ўзбекистонда кўрсатишга, кўришга, ўрганишга, намуна олишга арзигулик ижобий ишлар жуда кўп. Биз учун бутун дунё ҳамжамиятини шу ерга олиб келиш муҳим эди – чунки бир томондан, улар Ўзбекистонни кашф қилсин, тажриба алмашиш имконига эга бўлсин, бошқа томондан эса, Ўзбекистон ҳам глобал тажрибаларни ўрганиш имконига эга бўлсин.

Бу тадбир шундай бир оғир, синовли пайтда ўтаптики, ҳозирги дунёда тинчликпарвар овозлар, ташаббуслар низоҳатда зарур. Биз Президент Мирзиёевни, халқингиз йўлбошчисини айнан шундай тинчликсевар ташаббусларни, ғояларни илгари сураётган лидер сифатида биллашимиз.

Бугун, ушбу тарихий анжуман ўз ишмини муваффақият билан якунлаган бир паллада, бу фикрларимиз нақадар тўғри эканига яна бир бор амин бўлиб турибмиз. Парламентлараро иттифоқнинг юбилей Ассамблеясини Ўзбекистонда ўтказишга қарор қилганимиз нечоғлиқ асосли ва оқилона қарор бўлганини барча бирдек эътироф этмоқда. Биз ушбу саммит орқали нафақат Ўзбекистонни дунёга янги рақурсда таништирдик, балки дунё ҳамжамиятини ҳам юртингизга олиб келдик. Бу икки томонлама фойдали жараён бўлди.

Тинчликка интилиш, муаммоларни мулоқот орқали ҳал қилиш маданияти, давлат сиёсатининг фуқаролар фаровонлиги учун сафарбар қилиниши – буларнинг барчаси Президент Мирзиёевнинг анжуманда сўзлаган нутқидан ҳам яққол сезилиб турди. У киши нафақат мамлакат, балки минтақавий ва жаҳон тинчлиги учун ҳаракат қилаётган етакчи сифатида намоён бўлди.

Бу Ассамблея, шубҳасиз, бугунги куннинг сиёсий тарихида ўнмас из қолдиради. Ва у – Ўзбекистоннинг халқро парламент дипломатиясида тугган ўрнини янги босқичга олиб чиқади, десак, асло муболаға бўлмайдик.

– Дарҳақиқат, Ассамблеянинг Тошкентда ўтказилишида Президент Шавкат Мирзиёевнинг ташаббуслари муҳим аҳамият касб этганини тўғри эътироф этдингиз. Президентимизнинг Ассамблея минбаридан туриб сўзлаган нутқидан акс этган ташаббуслар ва ғоялар ҳақидаги фикрларингизни ҳам билмоқчи эдик.

– Мен Президент Шавкат Мирзиёевнинг қарашлари Парламентлараро иттифоқнинг асосий тамойиллари билан уйғун эканини ҳаммиша таъкидлаб келаман. Мамлакатингизда рўй бераётган ўзгаришларни кузатиб бораман. Ижти-



моий тармоқларни диққат билан ўқийман, телевидение орқали воқеаларни кузатаман, бу юрт тараққиётини мунтазам таҳлил қиламан.

7 апрель кун Ассамблея ялпи мажлисида Президент Шавкат Мирзиёев сўзлаган нутқ эса, бу инсон, унинг сиёсати ва фаолияти ҳақида илгари билганларимизни яна бир бор тасдиқлади. У киши ўзининг стратегик мақсадлари ва қарашлари Парламентлараро иттифоқнинг мақсад ҳамда тамойиллари билан уйғун эканини аниқ айтди.

Ассамблея ялпи мажлисидаги нутқ – фақат риторик чиқиш эмасди. Бу, айни пайтда, дунёдаги энг долзарб муаммолар юзасидан юксак бурчни ҳис этиш, тинчликка даъват ва парламент дипломатиясини амалиётга жорий қилишга қаратилган қадам эди.

Президентнинг Ғазо, Украина, Афғонистон каби можароли ҳудудлар бўйича билдирган фикрлари, мулоқот ва келишуви энг катта қадрият сифатида кўрсатган баёнотлари Парламентлараро иттифоқ руҳи билан ҳамоҳанг.

Шавкат Мирзиёев мулоқотнинг, очик фикр

алмашувнинг, ҳамкорлик асосида муаммоларни тинч йўл билан ҳал қилишнинг қадр-қиммати ва муҳимлигини таъкидлади.

Имкониятдан фойдаланиб, Ўзбекистон, Тожикистон ва Қирғизистон ўртасида яқинда имзоланган уч мамлакат давлат чегараларининг туташ нуқтаси тўғрисидаги шартнома билан табрикламоқчиман. Мен ушбу тарихий аҳамиятга эга ташаббус айнан Президент Мирзиёевга тегишли эканини жуда яхши биламан. Бу эса унинг нафақат Марказий Осиё минтақаси, балки дунё миқёсида тинчликни тарғиб этишга қодир етакчи эканини яна бир бор тасдиқлайди.

Бошқа муҳим жиҳат – ижтимоий адолат ва қашшоқликни камайтириш масаласи. Президентингиз ўз нутқидан «Камбағалликдан фаровонлик сари» деган фикрни илгари сурди. Шахсан мен бунини илҳомлантирувчи, замонавий давлат бошқарувиининг гуманистик қиёфасини намоён этувчи даъват сифатида қабул қилдим. Энг муҳими, у киши «яшил ривожланиш» ҳақида тўхталди. Бу нафақат иқтисодий, балки экологик

масъулиятни ҳам назарда тутди. Бундай ёрқин фикрлар XXI аср парламентаризми қандай бўлиши кераклигини белгилаб беришда муҳим аҳамият касб этади.

– Сиз бу каби саммитларда кўп бор иштирок этгансиз. Тошкентда бўлиб ўтган Ассамблеянинг ўзига хос жиҳатлари, глобал дунё ва парламентаризм учун аҳамиятини нима-ларда кўрасиз?

– Тошкентда бўлиб ўтган 150-Ассамблея – шунчаки оддий йиғилиш эмас. Бу – инсон тафаккури, давлатлар муносабати, жаҳон дипломатиясини янгилашга қаратилган тарихий воқеалик.

Биринчидан, бу саммит орқали биз глобал парламент ҳамжамиятини Ўзбекистонга олиб келдик. Давлатингиз анъаналар ва янгилаш ўртасида мувозанатни топган мамлакат сифатида бошқаларга ўрнатилган кўплаб

Оламда
Бугун

Кобул БМТ ҳисоботини рад этди

Афғонистон Покликни рағбатлантириш ва ахлоқсизликнинг олдини олиш вазирлиги БМТнинг Афғонистонга кўмаклашиш миссияси (UNAMA) томонидан эълон қилинган ҳисобот хулосаларини «ҳақиқатдан йироқ» ва «миш-мишларга асосланган» дея атади. Бу ҳақда вазирлик матбуот котиби Саиф уль-Ислом Ҳайбар маълум қилди.



онлаб афғонлар учун асосий хизматлар ва ёрдам олиш имкониятини чеклаётгани қайд этилади.

«Айрим ташкилотлар далилларни қасддан нотўғри талқин қилиб, бунда исломий тизимни айбашмоқда. Бу ташвиётдан бошқа нарсасиз», деган Ҳайбар ва толиблар талқинига кўра, қонун ҳақиятининг «ахлоқий соғломлашувига» хизмат қилаётганини таъкидлаган.

Яшин 25 дан ортиқ инсон умрига зомин бўлди

Ҳиндистоннинг Бихар штатида қаққан яшинлар оқибатида 25 дан ортиқ киши ҳалок бўлди.

Энг оғир ҳолат Наланда туманида кузатилди. У ерда 18 киши ҳалок бўлган. Маҳаллий Rashtriya Janata Dal партияси вакили Тежашви Ядавнинг маълум қилишича, пайшанба кунини бутун штат бўйлаб ноқулай об-ҳаво сабаб ҳалок бўлганлар сони 50 нафардан ошиб кетган.

Ҳокимият аҳолини эҳтиёт бўлишга, момақалдиروқлар пайтида имкон қадар уйдан чиқмасликка чақирмоқда. Худудда об-ҳаво шароитлари янада ёмонлашиши кутилмоқда.



Кўплаб тинч аҳоли жабр кўрди

Шияларнинг «Ансоруллох» ҳаракати (хусийлар) АҚШ қўшинлари Яманда уларнинг позицияларига қилган оммавий зарбалар натижасида фуқаролик инфратузилмасига жиддий зиён етгани ва 320 нафар тинч аҳоли жабрланганини маълум қилди.

«Қурбонлар асосан аёллар ва болалар. Ҳукумат бинолари, тураржойлар ва хусусий иморатлар вайрон қилинди. Шунга қарамай, ҳарбий салоҳиятимиз сақланиб қолмоқда, ҳатто мустаҳкамланмоқда», деган хусийлар вакили.

Авалпроқ хусийлар Қизил денгизда бир қатор ҳарбий кемаларга, жумладан, АҚШнинг Harry S. Truman авиаташувчисига хизмат кўрсатувчи кемага ҳам ҳужумлар уюштирган эди. Вашингтон эса бу ҳужумларга жавобан зарбаларни давом эт-

тирмоқда. Расмий маълумотларга кўра, операциялардан кузланган мақсад халқро денгиз йўлларини ҳимоя қилиш ва Эрон таъсирини камайтиришдир.



Олти давлат Украинага қўшин юборишга тайёр

«Қўнгиллилар коалицияси» деб ном олган 30 та давлат орасида фақат олти давлат расман Украинага ҳарбий қўшин юборишга тайёр эканини маълум қилган. Бу ҳақда AFP агентлиги европалик амалдорларга таяниб хабар берди.

Қўшин жўнатиш ниятини билдирган давлатлар қаторида Буюк Британия, Франция, Латвия, Литва, Эстония ва Польша тилга олинган. Бироқ бу давлатлардан ҳеч бири ҳозирча қўшинлар сони, жўнатиш муддати ва операцияда иштирок этиш шартлари ҳақида аниқ режа тақдим этмаган. AFP маълумотида кўра, асосий муаммолар-

дан бири АҚШ позициясидир. У ҳануз мавҳум. Айниқса, муаммони тинч йўл билан ҳал этиш истикболлари кўзга ташланиб турган бир паллада. Айрим давлатлар АҚШ билан мувофиқлаштирмасдан туриб қилинган кескин ҳаракатлар стратегик хатоларга йўл очишдан хавотирда.

ПРЕЗИДЕНТ ШАВКАТ МИРЗИЙЕВ ЯРАТИЛДИ

150 IPU ASSEMBLY

Tashkent, Uzbekistan 5-9 April 2025

учун берган интервьюси

лойиҳаларни амалга оширмоқда.

Иккинчидан, саммит пайтида 140 та парламент делегацияси давлатингиздаги ислохотларни ўз кўзи билан кўриш имконига эга бўлди. Улар Ўзбекистон парламенти Президент Мирзиёев бошчилигида қандай мустаҳкамланаётганига, парламентнинг фаолияти ва таъсир доираси кенгайиб бораётганига гувоҳ бўлишди.

Булларнинг барчаси сўздагина чин акс этаётган жараёнлар эмас. Амалда ўз ваколатларининг бир қисmini парламентга топширган давлат раҳбари камдан-кам топилади. Буни демократик қадриятларга садоқат рамзи, деб билман.

Айниқса, аёллар ва ёшлар вакилчилигининг ўсиши – парламентнинг инклюзивлигини, жамият манфаатларини тўлиқ ифода этаётганини кўрсатади. Бизнинг ташкилот учун энг аҳамиятли йўналишлар айнан шу – тенглик, инклюзивлик ва фуқаро манфаатларини ифода этиш.

Шунингдек, Парламентингиз тобора ёшармоқда. Мен Президент Мирзиёев билан илк бор 2021 йили учрашганман. Уша пайтда биз парламентда ёшларни қўллаб-қувватлаш кампаниясини андиқина бошлаган эдик. Ва мен у кишидан: «Жаноб Президент, илтимос, Парламентлараро иттифоқнинг ушбу кампаниясини қўллаб-қувватланг, унга ҳисса қўшинг», деб сўрагандим. У киши эса дарҳол «Хўп» деб жавоб берган эди. Бугун ана шу ваъданинг натижаси парламентингиз таркибига ёшлар ҳам кўплигида яққол кўзга ташланмоқда.

– **Ассамблеяда кўриб чиқилган, муҳокама қилинган масалалар юзасидан Тошкент Декларацияси қабул қилинди. Ушбу декларациянинг умуман дунё учун, қолаверса, парламентаризм келажиги учун аҳамиятини қандай баҳолаймиз?**

– Биз юртингизда глобал бошқарувнинг муҳим йўналиши – ижтимоий тараққиёт ва ижтимоий адолатни қўллаб-қувватлашда парламентлар ва депутатларни сафарбар қилиш учун йўл харитаси ишлаб чиқиш ниятида эдик. Зеро, парламентлар янада адолатли ва тенг жамият қуриш, тараққиёт жараёнида ҳеч ким ортда қолмаслигига эришиш йўлида хизмат қилади.

Шу боис биз учун мазкур ҳужжатда ана шу орзу-интилишларнинг акс этиши жуда муҳим ва табиий эди. Биз ушбу ҳужжат мазмун-моҳиятидан жуда мамнунмиз. Уни 150-Ассамблея томонидан бир овоздан, ҳатто олқишлар остида маъқуллангани биз учун катта аҳамиятга эга. Эндиликда биз ушбу ҳужжатдан парламентларни ижтимоий тараққиёт ва ижтимоий адолатни таъминлайдиган сиёсатларни ишлаб чиқиш, ресурсларни ажратиш бўйича янада фаол ишлашга ундаш ваколати сифатида фойдаланамиз.

Президент Шавкат Мирзиёев ўз нутқида аҳолининг ижтимоий ҳимоясини таъминлайдиган механизмларга эҳтиёж борлигини алоҳида таъкидлаб ўтди. У бандлик, ёшлар учун таълим каби ташаббуслар ҳақида гапирди. Бу ташаббусларнинг барчаси Тошкент Декларациясида ўз аксини топади. У, шубҳасиз, Президент

Шавкат Мирзиёев нутқидан илҳомланиб яратилган десам, асло муболага бўлмайди.

Биз бу ҳужжат парламентаризм фазилатларини жуда аниқ ифодалаган, деб ҳисоблаймиз. Унда парламентлар глобал саҳнадаги мавқеини мустаҳкамлаши, мураккаб муаммоларни ҳал этишда муҳим роль ўйнаши кераклиги яққол акс этган.

Шунинг учун биз ушбу Ассамблея иштирокчиларига бундай муҳим ҳужжатни қабул қилганликлари учун чўқур миннатдорчилик билдирамиз. Декларацияда қайд этилган ғоялар инсоният келажагига хизмат қилади. Унинг Тошкентда яратилиши – жаҳон парламент ҳамжамиятининг саъй-ҳаракатларига муносиб тўхфа бўлди.

– **Ўзбекистон 2017 йилдан Парламентлараро иттифоқ фаолиятида иштирокини қайта тиклади ва қисқа вақт ичида унинг фаол ҳамда ҳурматга сазовор аъзосига айланди. Сизнингча, Ўзбекистоннинг парламентлараро мулоқотни ривожлантиришдаги ҳиссаси қандай? Қайси йўналишлар кейинги ҳамкорлик учун пойдевор яратиши мумкин? Тошкентни глобал парламент ташаббуслари учун доимий майдончага айлантириш мумкинми?**

– Очик тан олиб айтишим керак: Тошкентда бўлиб ўтган юбилей Ассамблеяси Парламентлараро иттифоқ тарихидаги энг муваффақиятли анжуманлардан бирига айланди. Қўлимда ушбу 150-Ассамблея муносабати билан нашр этилган китоб турибди. Мен шунчаки унинг сарлавҳасини ўқиб бермоқчиман. У Ўзбекистон қайси нуктада турганини тушунишга ёрдам беради: «Парламент йўллари: Парламентлараро иттифоқдаги овозлар соломаси, 2020–2023».

Бу ерда икки жиҳат бор. Биринчидан, бугунги глобал жараёнларда халқлар овози эшитилиши учун, энг аввало, парламентлар ва парламент аъзолари халқро майдонда ўз овозларига эга бўлишлари керак. Бу Парламентлараро иттифоқ томонидан парламентлар ва парламент аъзоларини БМТ, Жаҳон савдо ташкилоти ёки бошқа глобал бошқарув институтлари каби халқро жараёнларда иштирок этишга қўмаклашиш орқали амалга оширилаётган парламентлараро ҳамкорлигининг бир жиҳатидир.

Иккинчи жиҳат эса парламент дипломатиясига тааллуқли. Чунки парламентлар – халқни ифодалайди, улар қаерда оғриқ борлигини яхши билади.

Икки давлат уруш ҳолатида бўлса, оддий фуқаролар энг кўп азият чекади. Парламентлар ана шу фуқаролар манфаатларини ҳимоя қилишда муҳим ўрин тутади. Шу боис дунё бўйлаб турли мамлакатлар парламентларига ўзаро мулоқот учун кўприк қуриш имконини бериш ниятида биз парламент дипломатиясини илгари суришга алоҳида эътибор қаратганмиз.

Утган йили илк бор икки давлат ўртасидаги тинчлик жараёнига ҳисса қўиши, ўзаро муно-

сабатларни тиклаш жараёнини тезлаштириш учун Арманистон ва Озарбайжон парламентлари спикерларини бир жойга йиғдик. Бу тарихий воқеа эди. Бу, айни пайтда, 1889 йилда Парламентлараро иттифоқ ташкил этилганида, таъсисчиларимиз Фредерик Пасси ва Рендольф Креймер таъкидлаган ғояга мос келади: урушга кириш керак эмас, шунчаки стол атрофида ўтириб, фарқлар ҳақида баҳслашиш ва умумий ечим топиш лозим.

Айнан шу ғоя икки Корея билан олиб бораётган ишларимизга ҳам асос бўляпти. Сўнгги бир неча йил ичида биз Корея яриморилидаги икки давлат ўртасида дўстона муносабатларни тиклашга ҳаракат қилиб келяпмиз. Тошкент Ассамблеяси давомиди ҳам биз улар билан музокаралар олиб бордик. Шимолий Корея парламенти беш йиллик танаффусдан сўнг Парламентлараро иттифоққа қайта қўшилди.

Ўқин Шарқ масалаларини ҳам тилга олиб ўтмоқчиман. Парламентлараро иттифоқ доирасида бу каби муаммолар, жумладан, Ҳазодаги воқеалар таҳлили билан шуғулланадиган махсус қўмита фаолият кўрсатяпти. Шунингдек, Украинадаги моjarони тинч йўл билан ҳал этишга қаратилган махсус ишчи гуруҳимиз ҳам бор.

Қайси жойда моjarо бўлса, қаерда кескинлик бўлса, биз парламентларни ўша ерга боришга, дипломатия, парламент дипломатиясини тарғиб этишга ундаб келяпмиз. Бу, менимча, жуда ажойиб ғоя. Мен шахсан шундай ташаббусларда иштирок этганим учун бу жараёни бағоят қадрлайман.

Масалан, Россия ва Украина ўртасида халқро даражада ҳам, бошқа жиҳатдан ҳам алоқа жуда кам. Лекин Парламентлараро иттифоқ доирасида улар ҳамон мулоқотда, чунки улар парламент дипломатиясининг аҳамиятига ишоняшди. Бу биз учун жуда муҳим. Биз Тошкентга айнан шунинг учун келдик. Бир ҳафта давомиди мамлакатингиз парламент дипломатиясининг пойтахтига айланди.

Сизлар барча давлатлар бир жойга йиғилиб, ўзаро мулоқот қилиши, турли фикрларга умумий ечим топиши учун имкон яратдингиз. Биз бундан ниҳоятда мамнунмиз.

– **Тошкентдаги форумнинг ташкилий даражасини қандай баҳолайсиз? Ўзбекистон Парламентлараро иттифоқ раҳбарияти таъкидлаб келётган очик ва мазмунли мулоқот муҳитини яратишга эришди, деб айта оласизми?**

– Сизга бир «сирни» очаман. Мен Президентингизга ҳазил қилиб, шундай дедим: «Жаноб Президент, сиз билан бир йилдан буён тун-кун тинимсиз ишладик. Мен ҳам ўзимни ўзбекистонлик, Ўзбекистон парламенти вакилидек ҳис қила бошладим», дедим. У киши «Бунинг учун сизга алоҳида ташақкур айтаман», дедилар. Аммо жиддий айтиладиган бўлса, бунинг замирида катта меҳнат, самимий мулоқот ва ўзгаришга бўлган умумий иштиёқ ётибди.

Тошкентда бўлиб ўтадиган Ассамблеяда бу даражада катта иштирок бўлишига бошида унча

ишонқирамаган эдик. Лекин натижа қутилганидан-да аъло бўлди. Кузатувчилар ва ассоциацияланган аъзоларни ҳисобга олмаганда, 140 та миллий парламент делегацияси иштирок этди.

Бу жуда катта муваффақият. Фақат шу эмас – бу ерда яратилган шарт-шароитлар ҳам жуда муҳим. Ўзбек халқи ва унинг раҳбарияти ушбу анжуман муваффақиятли ўтиши учун барча шарт-шароитларни яратди. Конференция зали, транспорт, бошқа логистика масалалари жуда юқори даражада ташкил этилди. Лекин рақамлар ортида бизни ҳайратга солган ва илҳомлантирган жиҳат – бу ердаги самимийлик, очиклик ва муҳокамаларнинг маънавий мазмунидир.

150-Ассамблея давомиди қабул қилинган Тошкент Декларацияси, шунингдек, Фаластин – Исроил муаммосига бағишланган резолюция глобал парламентлар тинчлик ва адолат тарафдори эканини яна бир бор исботлади.

Икки давлат ўртасидаги низо ечими борасидаги тинчликпарвар қарашларимиз айнан Тошкентда расман тасдиқланди.

Ассамблея давомиди 70 дан ортиқ ёндош давлатлар бўлиб ўтди. Энг муҳими, ҳар бир делегат ўзини қизиқтирган мавзуда иштирок этиш, фикр билдириш имконига эга бўлди. Биз, масалан, парламентларнинг метан гази чиқиндиларини қамайтиришдаги роли ҳақида ҳам муҳокамалар ўтказдик. Зеро, бу масала ҳам парламентларнинг иқлим ўзгариши оқибатларини юмшатишга қаратилган вазифалардан биридир.

Ассамблея доирасида қатор тарихий саналарни, хусусан, Пекин декларацияси ва Ҳаракатлар платформасининг 30 йиллигини нишонладик. Бу ҳужжат гендер тенглигини илгари суриш учун асосий дастур ҳисобланади. Шунингдек, Парламентлараро иттифоқ доирасида аёллар ҳаракатининг 40 йиллиги ҳам нишонланди. Мамлакатингиз раҳбарияти бу жараёнда фаол иштирокчига айланди.

Биз ёшларнинг парламентда иштирок этиши бўйича кампанияни айнан шу ерда – Тошкентда бошлаганмиз. Ва мен Президент Мирзиёевдан бу ташаббусни қўллаб-қувватлагани учун ғоят миннатдорим. У ушбу кампанияни қўллаб-қувватлаган биринчи давлат раҳбари бўлди.

Булларнинг барчаси Тошкентда бўлиб ўтди. Шунинг учун гўёки ҳар сафар биз янги кампания бошласак, Ўзбекистонга келишимиз керак, чунки бу ерда бизда мустаҳкам пойдевор бор. Ишонч билан айта оламани, энди бу шаҳар парламент дипломатиясининг юраги сифатида тилга олинади.

– **Сиз интервьюларингиздан бирида мамлакатимизда амалга оширилаётган камбағалликдан чиқариш дастурининг аҳамиятига юксак баҳо бергансиз. Парламентлараро иттифоқнинг инсон салоҳиятини ривожлантиришга қаратилган қадриятларига мос келадиган яна қандай ташаббусларни эътироф этган бўлардингиз?**

– Президент Мирзиёев илгари сураётган «Камбағалликдан фаровонлик сари» дастури – жонли сиёсат намунаси. Бу статистик кўрсаткичлар ёки стратегик режалар эмас, балки фуқаро ҳаётининг юрагига қаратилган амалий ҳаракатлар тизимидир. Бундай сиёсий ирода ва парламентга берилган қўшимча ваколатлар мамлакатда янги ижтимоий ёндашув локомотивига айланган. Бугунги Парламентингиз фақат қонун чиқарадиган эмас, балки одамлар дардини тинглайдиган, уларни ҳимоя қиладиган минбарга ҳам айланыпти. Парламентлараро иттифоқ бу каби ташаббусларни олқишлайди ва барча аъзо мамлакатларга ҳам шундай ҳаракатларни тавсия қилади.

Ҳа, бу анжуман – фақат учрашувлар эмас, балки ўзаро тажриба, фикр-мулоҳаза алмашиш майдонига айланади. Ваъда бераманки, Тошкент декларацияси қоғозларда қолиб кетмайди. Биз уни БМТга етказамиз ва бошқа халқро ташкилотлар орқали парламентлар фаолиятига жорий этамиз.

– **Кеча яқунловчи сессиядаги маърузанинг «Ташкилотимиз ўз тажрибасини янада орттириб боради, 77 та турли учрашувлар орқали глобал кун тартибига ҳисса қўшдик, дея айта оламиз», деб алоҳида таъкидладингиз. Тошкентда бўлиб ўтган Ассамблея ҳақида хулосаларингиз билан ўртоқлашсангиз.**

– Ассамблеянинг энг муҳим ютуғи – жаҳон парламентлари ўртасидаги интеллектуал ва маънавий яқинлашув бўлди. 77 та учрашув, ўнлаб резолюциялар ва аниқ дастурлар орқали биз глобал кун тартибига реал таъсир кўрсатдик.

Биз бу ерда гендер тенглиги, тинчлик, иқлим ўзгариши, саломатлик, терроризмга қарши кураш, экстремизмни илдиздаёқ бартараф этиш ҳақида гапирдик. Ундан ҳам муҳими, бу мавзўлар юзасидан бир-биримизни тингладик, баҳслашдик, ягона тўхтамга келдик ёки келиша олмасак ҳам, бир-биримизга ҳурмат билан қарашни ўргандик. Бу парламент дипломатиясининг энг гўзал жиҳатидир.

Сунъий интеллект масаласи, янги технологиялардан фойдаланиш, Президент Мирзиёев таъкидлаганидек, замонавий жамиятнинг ахлоқий мувозанатини сақлаш учун масъулият талаб қилади. Биз бу фикрни ҳам қабул қилдик, ҳам ургандик, ҳам таркатдик.

Ҳа, биз реалист бўлишимиз керак: ҳар бир масала юзасидан умумий келишувга эришиш – имконсиз. Аммо, энг муҳими, фикримиз турлича бўлса-да, бир мақсад сари интилишимиздир.

Шахсан мен учун бу анжуман профессионал ҳаётимдаги энг илҳомлантирувчи паллалардан бири бўлди. Тошкент қарбимизга парламент мулоқотининг энг самарали босқичи сифатида муҳрланади.

Хусан ЭРМАТОВ суҳбатлашди

Алиев Евроиттифоқни айблади

Озарбайжон Президенти Илҳом Алиев Европа Иттифоқи ҳаракатларини танқид қилиб, Брюсселни Боку ва Ереван ўртасидаги музокара жараёнига аралашади айблади. Бу давлат раҳбарининг расмий веб-сайтида чоп этилган маълумотда қайд этилган.

«Биз фақат чегараларни очиш ҳақидаги қақриқларни эшитяпмиз. Лекин бу Европанинг иши эмас. Европа Иттифоқи бу жараёнлардан қанча узоқ бўлса, ҳамма учун шунча яхши», деган Озарбайжон раҳбари.

У, шунингдек, Европа Комиссияси Арманистонни бир томонлама қўллаб-қувватлаётгани, Европа ва Марказий Осиё ўртасидаги транзит йўлақларида Озарбайжон ва Гуржистоннинг муҳим роли эътибордан четда қолдирилаётганидан норози бўлган.

«Гуржистонни муҳокамалардан бутунлай четлаштиришган гўё. Бу адолатсиз ва қабул қилиб бўлмайдиган ҳолат», дея қўшимча қилган Илҳом Алиев.



АҚШ Президенти Дональд Трамп Хитойга нисбатан тариф босимини кескин кучайтирди. CNBC телеканалнинг Оқ уйга таяниб хабар беришича, 10 апрелдан бошлаб, Хитойдан келтирилаётган импорт товарларига қўйилаётган бож ставкаси амалда 145 фоизга етказилган.

АҚШ Вице-президенти Жей Ди Вэнснинг сўзларига кўра, Трамп маъмуриятининг мақсади тўқнашув эмас, балки «одил савдо ва иқтисодий мустақиллик»ни таъминлашдир.

Пекин Вашингтон ҳаракатларига жавобан кескин баёнот берди. Хитой Ташқи ишлар вазирлиги вакили Линь Цзянь таъкидлашча, савдо урушларида ғолиблар бўлмайди.

Ўз навбатида, Хитой ҳам 12 апрелдан АҚШ маҳсулотларига бож ставкаларини 84 дан 125 фоизга оширишини маълум қилган.

Европа раҳбарияти Си Цзиньпин билан учрашмоқчи

Европа комиссияси раиси Урсула фон дер Ляйен ва Европа кенгаши раиси Антониу Кошта июль ойи охирида Хитой Халқ Республикаси раиси Си Цзиньпин билан шахсан учрашиш мақсадида Пекинга ташриф буюришни режалаштирмоқда.

Агар ташриф амалга ошса, бу Европанинг Хитой билан юқори даражадаги кетма-кет иккинчи учрашуви бўлади ва яна Пекинда бўлиб ўтади. Ҳолбуки, одатда бундай саммитлар навбатма-навбат Пекин ва

Брюсселда ташкил этилиши керак. Охириги ойларда Европа Иттифоқи Хитой томонини саммитни Брюсселда ўтказишга кўндиришга уринди, бироқ рад жавобини олди. Си Цзиньпин 2025 йилда хорижий сафарларни

режалаштирмаган, фақат Москвага Ғалаба-нинг 80 йиллигини нишонлаш учун боради.

Манбаларга кўра, бу ташриф Европа Иттифоқининг стратегик мулоқот каналларини очик сақлаб қолиш учун навбатдаги уриниши бўлади. Айниқса, бу Европа саноатининг Хитой экспортига тобора кучайиб бораётган боғлиқлиги, шунингдек, Пекининг Украинадаги уруш ва Россия билан муносабатларига оид позицияси фонида долзарб аҳамиятга эга.

Эрондан АҚШга вақтинча ядровий келишув таклифи

Эрон Ташқи ишлар вазирлиги расмий вакили Эсмаил Бағойи ижтимоий тармоқлардаги баёнотида Техрон АҚШ билан музокараларга «ўта жиддийлик ва эҳтиёткорлик билан» киришганини ва Вашингтондан масъулиятли ёндашув кутаётганини билдирди.

«Биз дипломатияга имкон бермоқдамиз. АҚШ ўзининг тажовузкор таҳдидларига қарамасдан, бунки қадрлаши керак», деди дипломат.

Манбаларга кўра, Техрон тўлиқ ядровий келишувга олиб борадиган ўтиш босқичи сифатида вақтинча шартномани таклиф қилиш имконини кўриб чиқаяпти. Таклифга урани бойитишни тўх-

татиш, захираларни қисқартириш ва МАГАТЭ инспекторларига кенроқ кириш имконини бериш каби шартлар киритилиши мумкин.

Аввалроқ АҚШ энергетика вазири Крис Райт Вашингтон Эроннинг ядровий дастурини тўхтатиш учун «таъсир воситалари»дан фойдаланиш ниятида эканини маълум қилган эди.



Оламгир ОТАЁРОВ тайёрлади

БУРЧГА САДОҚАТ — ҲАЁТ БЕЗАТИ



Ҳарбий формадаги аёлни кўрганимизда беихтиёр тўлқинланиб кетамиз. Дилимизда ҳам фахр, ҳам ҳавас уйғонади. Юрт посбони саналган бундай инсонларда метин ирода, қатъий интизом, туғилиб ўсган диёри ва халқига садоқат кучли бўлади.

Албатта, ишқ бошқа, ҳавас бошқа, деганларидек, бу касбнинг ўзига яраша қийинчиликлари ҳам бор. Айниқса, аёл учун. Уларнинг руҳан кучли бўлганлари, ўз касбини севганлари, оиласида тинчлик-тотувлик ярата олганлари муваффақиятларга эриша олади. Сайёра Ҳайитова ҳам ана шундай хотин-қизлар жумласидан.

ЯҚИНДА ЎЗБЕКИСТОН РЕСПУБЛИКАСИ МИЛЛИЙ ГВАРДИЯСИНИНГ ЯККАСА-РОЙ ТУМАНИ ҚҮРИҚЛАШ БЎЛИМИ 2-ОТ-РЯДИ, 1-ГУРУҲ САРДОРИ, ЛЕЙТЕНАНТ САЙЁРА ҲАЙИТОВА ҲАЁТИДА УНУ-ТИЛМАС ВОҚЕА РҮЙ БЕРДИ. У 8 МАРТ — ХАЛҚАРО ХОТИН-ҚИЗЛАР КУНИ МУНОСАБАТИ БИЛАН «СОДИҚ ХИЗМАТЛАРИ УЧУН» МЕДАЛИ БИЛАН ТАҚДИРЛАНДИ. КУКСИДАГИ ЮКСАК МУКОФОТ ЯРАШИБ ТУРГАН САЙЁРА ҲАЯЖОНЛИ ТААССУРОТЛАРИНИ БИЗ БИЛАН ЎРТОҚЛАШДИ.

— Мукофотни шахсан давлатимиз раҳбари қўлидан олганим мени дунёдаги энг бахтли аёлга айлантирди. Бундай юксак эътирофни кутмаган эдим. Йўқ, аслида ички туйғу билан қачондир бунга эришаман, деб ўйлардим. Лекин бу илл насиб этишини билмагандим. Уша кундан бери қувончдан ўзимга келолмаяпман.

Бекзод туманида туғилганман. Тошкент кимё-технология институтини битирганман. 2005 йилдан бери ички ишлар тизимида, Миллий гвардия соҳасида ишлаб келаман. Ҳарбий фаолиятимга ҳам 20 йил тўлди. Эр-каклар билан елкама-елка туриб хизмат қилиш осон эмас, албатта. Агар аёл ўз касбини севса, яқинлари уни қадрласа, қийинчиликларни осон енгиб ўтади. Мени ҳаммиша турмуш ўртоғим, оилам қўллаб-қувватлаб келган. Касбим билан фахрланаман, соҳамни яхши кўраман, уч нафар қизимиз борлигидан гурурланаман.

Хизмат давомида эсда қоладиган воқеалар, кези келса, қийинчиликлар, ширин хотиралар кўп бўлган. Айниқса, 2016 йилдаги вазият шунни тақозо этарди. Хизматда тунги смендада ишлардим. Турмуш ўртоғим банк ходими бўлган. Фарғона вилоятида хизмат сафарига эди. Болаларим ҳали ёш. Менинг ота-онам Тошкент вилоятида, ҳўжайинимники Самарқандда

бўлгани сабабли фарзандларимизга қарашга имконлари йўқ эди. Тунги навбатчиликда турганимда болалар ёлғиз қолиши ҳам мумкин эмасди. Турмуш ўртоғимнинг Фарғонадан келиб-кейтиши эса осон бўлмаган. Лекин кечаси етиб келарди. Тонгда сменани топишиб, уйга келганимда яна Фарғонага учиб кетарди. Ушанда хизмат бурчимни қанда қилмай бажаришим учун шароит яратиб берган. Бунинг учун беҳад миннатдорман. Мукофотланишимда унинг, қайнона ва қайнотамнинг ҳам ҳиссалари катта.

Қўриқлаш бўлими сардори Сайёра Ҳайитбоева бўлим хотин-қизлари ва ҳарбийларнинг оила аъзолари билан ишлашдек жамоат ишини ҳам бажариб келмоқда. Ҳамкасблари оиласини беш қўлдек билишга ҳаракат қилади. Чунки оила тинч бўлса, ишда унум бўлади. Ҳарбийнинг аёли боқимандалик қайфиятида бўлмаслиги, турмуш ўртоғига ҳамфикр, маслақдош бўлиши керак. Шу боис Сайёра Ҳайитбоева уларни бандликка жалб этишга ҳаракат қилади. Жумладан, жорий йилнинг ўтган даврида 20 нафарга яқин аёлларни тадбиркорлик марказида турли хунар ва касбга ўқитишга эришди.

— ХАЛҚИМГА, ДАВЛАТИМГА ХИЗМАТ ҚИЛАЁТГАНИМДАН, БОШҚАЛАРГА НАФИМ ТЕГАЁТГАНИДАН ХУРСАНДМАН. БУНДАН КЕЙИН ҲАМ СИДҚИДИЛДАН ХИЗМАТ ҚИЛИШГА, ЯНАДА ЯХШИРОҚ НАТИЖАЛАРГА ЭРИШИШГА ИНТИЛАМАН. ЮРТ ХИЗМАТИДА ЭКАНМАН, ВАТАН ТИНЧЛИГИ, ФАРО-ВОНЛИГИ, ОДАМЛАРИНИНГ ХОТИРЖАМЛИГИ УЧУН ҲАММА НАРСАГА ТАЙЁРМАН. — ДЕЙДИ ЛЕЙТЕНАНТ АЁЛ ҲАРБИЙ ЧАСИГА ҚЎЛИНИ ЧЕККАСИГА ТЕККИЗИБ.

Ҳилола
ИБРОХИМОВА,
журналист

■ ОРАМИЗДАГИ ОДАМЛАР

— Мендан болалигим ҳақида сўрашса, доим ҳам жавоб бергим келарвермайди. Ахир, ўзингиз ўйланг, кўзи ожиз инсоннинг болалиги қандай ўтади?.. Баъзан уй бурчагида ёлғиз ўтирганимни, баъзан мендан ўзини олиб қочган ўртоқларимни эслайман... Бир сафар кўнглим қаттиқ оғриган. Чунки ўшанда қўшни болалар «Қасалинг бизга ҳам юқади, биз сен билан ўйнамаймиз!» деб мени сафларидан чиқаришган. Бу воқеани ҳали-ҳануз унутолмайман. Зеро, бу менга етказилган маънавий шикаст — болалик травмаси эди.

МАТОНАТДАН ТУҒИЛГАН БАХТ

Дарвоқе, дунёни кўрмай яшаш, ҳаёт учун курашиш, тик оёқда туриш жуда қийин. Инсоннинг одамлар даврасидан, жамиятдан узиб қўйилиши эса икки барабар оғир. Қаҳрамонимиз Лолахон Нажмиддинова 63 йил дунёни яхши кўра олмади, жигаргўшалари ва ақинларининг юз-кўзларига тўйиб-тўйиб боқолмади. Чунки у кўриш қобилияти суст ҳолда туғилди. Шу боис оила аъзолари, фарзандлари, таъбир жоиз бўлса, бутун оламини парда ортидан аранг кўргандай бўларди.

Айтишича, бундай қисматга дуч келишига ота-онаси яқин қариндош бўла туриб, турмуш кургани сабаб бўлган. Шунга қарамай, у тушқунликка берилмади. Аксинча, айрим соғлом инсонлардан ҳам кўра кўпроқ ўқиди, изланди, ҳаракат қилди. Аввал кўзи ожизлар мактабиде, сўнгра лицейда ҳуқуқшунослик йўналишида тахсил олди. Умрининг икки йилли эса Самарқанддаги махсус гилам тўқиш корхонасида ўтди. Брайль алифбосини мукаммал ўргангани боис кўллаб бадий асар, ҳуқуқий мавзудаги китобларни мутлола қилди. Бир муддат Кўзи ожизлар жамиятида ҳуқуқшунос бўлиб ишлади. Бироқ доимо кимнингдир ёрдамига муҳтож бўлиб яшаш, бутун ҳаёти бошқа инсонларга боғлиқ бўлиб қолиши унинг кўнглига оғир ботарди. Инчунин, ҳаракатланишда, кўча-кўйда юришда доимо кимларнингдир ёрдамига таянса-да, илм олиш, билим ва маҳоратини оширишда ўзига ўзи тиргак бўлди. Турмуш ўртоғи билан ажрашиб, рўзгор юки, фарзандлар тарбияси ёлғиз ўзининг зиммасига тушганида ҳам эсанкираб қолмади. Икки ўғли ва бир қизини ўқитди, уйли-жойли қилди. Умри давомида «Имконсизман» деган сўзни асло ишлатмади.

Кўзи ожиз инсонлар ўқилмайдиган китобга ўхшайдилар. Уларга ҳеч қим эътибор бермайди. Аммо Лолахон опа Тошкент шаҳар кўзи ожизлар

жамияти, маҳалла фуқаролар йиғини раиси ўзига кўп ёрдам берганини мамнуният билан тилга олади. Айни чоғда, ҳуқумат аралашувисиз ечим топилмайдиган айрим масалалар борлигини ҳам эслатади. Масалан, йўл чироқлари овозли эмаслиги, автобус, метро сингари жамоат транспортлари ва бекатлардан фойдаланишдаги ноқулайликлар, кириб-чиқиш учун махсус йўлақлар йўқлиги туфайли кўзи ожизлар эркин ҳаракатлана олмаслигидан, ўзларини жамиятдан узилиб қолгандек ҳис қилишларидан афсусланади. Қолаверса, улар меҳнат қиладиган махсус корхоналар мавжуд эмаслиги асосий муаммолардан бири, деб ҳисоблайди. Ваҳоланки, бир вақтлар Самарқанддаги махсус гилам тўқиш фабрикасида кўпчилик ишлаб, рўзгорини бутларди. Бироқ у кейинчалик ёпилиб кетди.

Лолахон Нажмиддинова ҳуқуқшунослик бўйича ўқитган пайтлари илмий-оммабоп, бадий, ҳуқуқий китобларни топишда анча қийналди. Синовларни енгиб ўтиб, ўзида яшаш учун куч топа олди. Олдига аниқ мақсадлар қўйди. Самараси чакки бўлмади. Энг муҳими, у қалбида келажакка ишонч сўнмагани эвазига ёруғ оламни кўра бошлади.

Ҳа, ҳа, ишонаверинг, худди шундай бўлди. Шифокорлар операция қилиш фойдасиз эканини таъкидлашганига қарамай, муъжиза рўй берди. «Вожаб, — дейди у бошини сарак-сарак қилиб, — узоқ йиллар дунё шунчалар гўзал эканлигини кўрмай зулмат ичра қандай умр кечирган эканман-а?!». Яқинларинг ва фарзандларинг кўзларидеги меҳрни илғаш эса қанчалар гўзал туйғу. Қолаверса, одамларнинг ўзаро меҳр-оқибатини, бир-биридан ёрдамини аямаслигини ўз кўзинг билан кўриб ва қалбан ҳис этиб яшаш ҳар қандай инсон учун ҳам энг олий бахт экан!».

Баралла айтиш мумкинки, Лолахон Нажмиддинованинг ҳаёти инсон иродаси ва қатъиятнинг ёрқин тимсолидир. Бу аёл тақдиринг оғир синовларига дош берди, қийинчиликларни мардонавор енгиб ўтиб, мудом олға интилди. Унинг ҳаёти нафақат кўзи ожизлар, балки ҳаммамиз учун ҳам ибрат бўлади.

Дарвоқе, инсоннинг жисмоний имкониятлари чекланган бўлиши мумкин, аммо унинг интилиши, билимга чанқоқлиги ва ҳаётни севиши чексиз ва чегарасиздир. Айни чоғда, оддий бир ҳақиқатни зинҳор-базинҳор унутмаслик даркор. У ҳам бўлса, кўзи ожиз инсонларнинг аксарияти меҳрдан ташқари, реал имкониятларга ҳам муҳтож. Боя юқорида тилга олинган овозли йўл чироқлари, алоҳида йўлақлар, қўлай транспорт воситалари ва махсус иш ўринлари улар учун жуда зарур.

Бинобарин, жамият фақат кучли инсонлар билангина эмас, ҳимояга ва эътиборга муҳтожларни қўллаб-қувватлаш билан ҳам чинакам тараққиётга эришиши аниқ!

Диёра РАВШАНОВА
«ISHONCH»

■ ИБРАТ

Йўлак бўйлаб юраркан беихтиёр тўхтаб қолди. Қаршисида оппоқ либоси мўйсафид меҳр билан тикилиб турарди.

— Болам, ёрдам бера оласанми? — деди у майин овоз билан. Отаҳон қўлидаги эски кўлёмзани узатди. — Ёшлимимда жуда кўп ҳикоялар ёзганман, лекин уларни ҳеч қим ўқимаган. Бу сўнги асарим. Балки сен сақларсан? Бекзод кўлёмзани авайлаб олди. Саҳифалар оч-сарик рангга кирган, лекин ҳарфлари тиниқ эди. — Раҳмат, болам, — дея нуроний йўлида давом этди. Бекзод беихтиёр ортига ўтирилди. Қор ёғишда давом этар, лекин мўйсафиднинг ўзи ҳам, қордаги изи ҳам кўринмасди. Бекзод қўлидаги кўлёмзани очди-но, кўзи шундай жумлага тушди: «Ҳаёт — бу из қолдириш санъати».

Шаҳбоз МУРТАЗОЕВ,
Бош прокуратура ҳузуридаги
ҳуқуқни муҳофаза қилиш
академияси талабаси

■ ЭЪЛОН

«ALLES SAG'LIK GROUP» МЧЖ шаклидаги хорижий корхона таъсисчиларининг навбатдаги умумий йиғилиши 2025 йил 12 апрель куни соат 12:00да жамият маъмурий биносининг мажлислар залида ўтказилади. Рўйхатга олиш соат 11:00да бошланади.

«ALLES SAG'LIK GROUP» МЧЖ шаклидаги хорижий корхона таъсисчиларининг навбатдаги умумий йиғилишида жамият таъсисчиси шахсан ёки ишончнома асосида вакили иштирок этиши лозим.

«ALLES SAG'LIK GROUP» МЧЖ шаклидаги хорижий корхона таъсисчиларининг навбатдаги умумий йиғилиши кун тартибига қўйидаги масалалар қўйилган:

1. «ALLES SAG'LIK GROUP» МЧЖ шаклидаги ХК Бош директори FATIH AKGUN ҳисоботи.
2. «ALLES SAG'LIK GROUP» МЧЖ шаклидаги ХКнинг 2024 йил якуни бўйича фойда ва зарарини, балансини ҳамда харажатларини тасдиқлаш (бош ҳисобчи ҳисоботи).
3. «ALLES SAG'LIK GROUP» МЧЖ шаклидаги ХКнинг 2024 йил якуни бўйича соф фойдасидан жамият таъсисчиларига тўланадиган дивиденд миқдори ва тўлов муддатини белгилаш.
4. «ALLES SAG'LIK GROUP» МЧЖ шаклидаги ХКнинг 2024 йил якуни фондидаги 749.897.000 (етти юз қирқ тўққиз миллион саккиз юз тўқсон етти минг) сўмлик 9,7 фоиз жамият ҳисобида турган улушни жамият таъсисчилари ёки унчинчи шахсларга сотиш.
5. «ALLES SAG'LIK GROUP» МЧЖ шаклидаги ХКнинг таъсис шартномаси ва уставиға ўзгартириш қиритиш ва қиритилган ўзгартиришларни давлат рўйхатидан ўтказиш.
6. «ALLES SAG'LIK GROUP» МЧЖ шаклидаги ХКнинг нормал иш фаолият қиритиши учун жамиятга лаборатория жиҳозларини сотиб олиш, эскирган жиҳозларни сотиш, фойдаланишда бўлган жиҳозларни бошқа шахсларга ижара шартномаси асосида ижарага бериш масаласи.
7. «ALLES SAG'LIK GROUP» МЧЖ шаклидаги ХКнинг Бош директори FATIH AKGUNни муддатидан олдин эгаллаб турган вазифасидан озод этиш ҳамда янги Бош директорни сайлаш.

МАЪМУРИЯТ

УСТОЗ ВА ШОГИРД

Кечки пайт офтобнинг сўнгги нурлари эски мадрасанинг гиштин деворларига тушаётган маҳал эди. Ёши олтмишдан ошган Шайх Усмон ўзининг азал-ий одати бўйича дарс тугаганидан кейин ҳам ҳужрасида қолиб, китоб varaқларди. Унинг ёнида Абдуллоҳ — йиғирма беш ёшлардаги, билимга ташна, савол беришга ўч шоғирди ўтирарди.

— Устоз, — деди Абдуллоҳ, — нима учун баъзан тўғри йўлдан юрган одамлар ҳам қийинчиликларга дуч келишади? Ахир биз ҳақиқатга хизмат қил-

моқдамиз-ку?

Шайх Усмон жилмайди. У Абдуллоҳнинг ҳали ҳаёт синовларига тайёр эмаслигини ҳис этарди. Сўнг стол устидаги эски жуғрофий харитани олиб, шоғирдига кўрсатди.

— Бу ерга қарагин, болам, — деди. — Дарё ҳеч қачон текис оқмайди. У тоғлар, жарликлар, тўсиқларни енгиб ўтади. Ҳақиқат йўли ҳам шундай — унда синовлар, машаққатлар бўлади. Агар сен осон йўлни танласанг, тўсиқлардан чиқиб кетиш мушкул бўлади.

Ҳақиқат йўли ҳар қанча оғир бўлмасин, уни босиб ўтиш шартлигини англаган ёш йигит, шу кун ҳаётдаги энг муҳим сабоқни олди.

ИЗ

Кеч куз. Осмонни булут қоплаб, шаҳар узра майин қор ёға бошлади. Бекзод шаҳар марказидаги китоб дўконидан чиқиб, уйига йўл олди. Қўлидаги эски муқовали китобни маҳкам қучганича, турфа излар тушган

Азиз газетхон!

Мароқли
дам олинг!



Бахтиёр Холхўжаев ижросида


«ЯНА КЕЛАР
СЕН КУТГАН БАҲОР»

қўшиғи

Қўй, оҳ чекиб ўртанма бунча,
Табассум қил, кўзлари хумор.
Битта бўлмас бутонда гунча,
Бошқасининг очилмоғи бор.
Сабр айлаш тагин келгунча
Яна келар сен кутган баҳор.

Саъдулла Ҳаким шёъри

MUASSIS:



«Ishonch» va
«Ishonch-Doeeprie»
gazetalari
tahrir hay'ati:

Qudratilla RAFIQOV
(tahrir hay'ati raisi),
Ulug'bek JALMENOV,
Anvar ABDUMUXTOROV,
Sayfullo AHMEDOV,
Akmal SAIDOV,
Ravshan BEDILOV,
Qutlimurot SOBIROV,
Suhrob RAFIQOV,
Shoqosim SHOISLOMOV,
Hamidulla PIRIMQULOV,
Nodira G'OIYIBAZAROVA,
Anvar QULMURODOV
(Bosh muharrirning
birinchi o'rinbosari).

Mehridin SHUKUROV
(Mas'ul kotib — «Ishonch»),
Valentina MARSENYAK
(Mas'ul kotib — «Ishonch-Doeeprie»)

Bosh muharrir
Husan ERHATOV

Bo'limlar:
Kasaba uyushmalari hayoti —
(71) 256-64-69
Huquq va xalqaro hayot —
(71) 256-52-89
Milliy-ma'naviy
qadriyatlar va sport —
(71) 256-82-79
Xatlar va muxbirlar
bilan ishlash —
(71) 256-85-43
Marketing va obuna —
(71) 256-87-73

Hududlardagi muxbirlar:

Qoraqalpog'iston
Respublikasi —
(+998-99) 889-98-20
Andijon viloyati —
(+998-99) 889-90-23
Buxoro viloyati —
(+998-99) 889-90-31
Navoiy viloyati —
(+998-99) 500-05-12
Jizzax viloyati —
(+998-99) 889-90-34
Namangan viloyati —
(+998-99) 213-09-66
Samarqand viloyati —
(+998-99) 889-90-26
Sirdaryo viloyati —
(+998-99) 889-98-55
Surxondaryo viloyati —
(+998-99) 379-19-70
Toshkent viloyati —
(+998-99) 600-40-44
Farg'ona viloyati —
(+998-99) 889-90-24
Xorazm viloyati —
(+998-99) 889-98-01
Qashqadaryo viloyati —
(+998-99) 705-08-93

«Ishonch»dan
olingan ma'lumotlarda manba
sifatida gazeta nomi
ko'rsatilishi shart.

Mualliflar fikri tahririyat
nuqtai nazaridan
farqlanishi mumkin.

Navbatchi muharrir:
G. Odashboyeva

Musabhihlar:
D. Xudoyberganova,
U. Xudoyberganova

Sahifalovchi:
H. Abdjalilov

Bosishga topshirish vaqti — 00:20
Topshirildi — 00:50

Bahosi kelishilgan narxda

Manzillimiz:
100165, Toshkent shahri,
Buxoro ko'chasi, 24-uy.
E-mail: ishonch1991@yandex.uz

Gazeta haftaning seshanba,
payshanba va shanba
kunlari chiqadi.
Gazeta «Ishonch»ning
komputer markazida
terildi va sahifalandi.

Nashr ko'rsatkichi: 133

Umumiy adadi
32 448 ta

Shundan:
6 257 nusxasi
«Sharq» nashriyot-matbaa
aksiyadorlik kompaniyasi
bosmaxonasi — Toshkent shahri,
Buyuk Tiron ko'chasi,
41-uyda;

18 276 nusxasi
«Erudit» MCHJ bosmaxonasi —
Samarqand shahri, Spitamen
ko'chasi, 270-uyda;

7 915 nusxasi
«Poligraf-Press» MCHJ
bosmaxonasi — Marg'ilon shahri,
Turkiston ko'chasi, 236-«b» uyda
chop etildi.

Gazetaning poligrafik
jihatdan sifatli chop
etilishiga bosmaxona mas'ul.

Gazetaning etkazib
berilishi uchun obunani
rasmliylashtirgan
tashkilot javobgar.

Gazeta ofset usulida,
A-2 formatida bosildi.
Hajmi 2 bosma taboq.
Buyurima G-411